



Izrečena presuda za međunarodni šverc droge i pokušaj ubistva

Mirabeli Coker šest i po godina zatvora

Sud BiH prihvatio nagodbu koju je Cokerova sklopila sa Tužilaštvom BiH, dok će sporazumi koje su sklopila tri člana iste grupe biti razmatrani 8. januara

Mirabela Coker (1977) iz Zepča osuđena je na šest i po godina zatvora zbog pripadnosti organizovanoj kriminalnoj grupi koja je švercovala drogu, te pokušaja ubistva. Ovom presudom, koju je nakon razmatranja sporazuma o priznanju krivnje izrekla sutkinja Suda BiH Hasija Mašović, od Cokero-ve su oduzeti imovinska korist pribavljena izvršenjem krivičnog djela, odnosno 466 maraka, 924 kune i 525 eura, te predmeti korišteni pri izvršenju djela, a njoj su ukinute ranije određene mjere zabrane.

Pucnjava i hapšenje

Prije razmatranja nagodbe, Sud je odvojio predmete protiv Cokero-ve, ali i optuženih Almira Helvide (1982), Elmira Imamovića (1977) i Nermine Klobodanović (1976), koji su također, sklopili sporazume sa Tužilaštvom, a koji će biti razmatrani 8. januara, dok se Huseinu Selimoviću (1959) i Husi Mustafiću (1981) suđenje nastavlja.

Inače, Cokerova je osuđena za pokušaj ubistva Mustafića, a pored organiziranog kriminala i šverca drogom, Helvida i Imamović se terete za izazivanje opće opasnosti. Preciznije, svim optuženim na teret je stavljen organizovani kriminal, odnosno međunarodni šverc marihuane na relaciji Albanija - Make-



Droga nađena u plinskoj boci unutar spremnika auta

donija - Srbija - BiH - Hrvatska, te da su od početka 2012. do marta 2013. godine u nekoliko navrata prokrijumčarili veće količine marihuane, najčešće po 25 kilograma.

Mirabela Coker, Imamović i Helvida su, podsjećamo, uhapšeni u martu u akciji Bela, koju su pripadnici SIPA, u saradnji sa MUP-om ZDK-a i MUP-om SBK-a, izveli na području sela Dusina, 20-ak kilometara od Zenice, te Tuzle i Busovače, kada su zaplijenjena 22 kilograma skanka, ali i određena količina vojnog naoružanja, mobilni telefoni, SIM kartice i drugi predmeti. Droga je, naime, trebala biti prošvercovana u pežou

na područje Hrvatske.

Bezbjednosne agencije su, naime, pratile su dvije grupe koje su trebale izvršiti primopredaju droge, a hapšenje je izvedeno nakon što je došlo do pucnjave ispred kuće Bakira Helvide, u kojoj su u tom momentu, osim Bakira, bili njegov sin Hasan Helvida, rođak Almir Helvida i zet Elmir Imamović.

Do kuće Helvida u pasatu su se, navodno, dovezli Mirabela Coker i Sanel Džinić iz Zenice, te Adnan Mingić iz Tuzle i Huso Mustafić. Do obračuna, u kojem je lakše ranjen Mustafić, došlo je jer je pošiljka marihuane, nađena u plinskoj boci unutar spremnika



Mirabela Coker

Foto: Sud BiH

auta, umjesto kod Mirabelinog nevjenčanog supruga Sulje Škapura, završila kod Helvide. Ekipa iz pasata je, nakon pucnjave pokušala pobjeći, ali su ih desetak minuta nakon do- jave, na magistralnom putu M-5 uhapsili specijalci. Sve aktere ovog obračuna, osim Bakira i Hasana Helvide, koji su predati zeničkom Tužilaštvu, te nakon saslušanja pušteni, preuzelo je Tužilaštvo BiH.

Nakon što je "pala" pošiljka od 22 kilograma skanka u BiH, policija u Zagrebu je uhapsila Škapura, te Adisa Serhatlića, Samira Đukića i Muhameda Husića.

Naredio ubistvo

Kod Škapura je tada pronađeno skoro 16 kilograma marihuane te 41.700 kuna, 1.700 eura, 1.500 maraka, te nešto dolara koje je, navodno, zaradio preprodajom droge. Aktivnostima hrvatske policije broj uhapšenih se popeo na 10, a količina zaplijenjene droge na 40 kg, čija je vrijednost na ilegalnom narko- tržištu oko 180.000 KM.

U međuvremenu, Škapur je u Zagrebu osuđen na 12 godina zatvora, a kasnije se moglo čuti kako je on iz Zagreba naredio ubistvo Helvide, za što je Cokerova u Zenici angažovala osumnjičene Adnana Mingića, Sanela Džinića i optuženog Mustafića. **L. S.**